



*Sabtu, 21 Mei 2022*  
**Ogen: Kejadin 41: 48-49**



*Ipepulungna Kerina*



**K**alau ingin mengetahui seseorang jujur dan benar berikanlah dia kuasa. Perkataan enda nuduhkan maka mbue kalak bujur tapi banci sengkemirep mata papak erkiteken kuasa ras sen. Jusup salah sada tokoh kalak si bujur, maka bekas kebujurena ibereken Firaun kuasa man bana, jadi orang kepercayaan. I bas ia makeken kuasa si lit i bas ia, kai siilakokenna e me erbahanca maka bangsa Mesir e ngasup jadi lumbung pangan. Janah arah si e pe Mesir jadi sada bangsa si mbelin ras idarami kalak. Sabap i bas masa rani si riba-iba e, ipepulung Jusup ulih peranin warga, subuk gandum bage pe ulih sinuan-sinuan sidebanna. Arah si e ia ngaturken keseimbangan ketersediaan pangan, gelah ula sia-sia bas masa riba-iba, bage pe ula sempat la lit bas masa perlego.

Ise nge ndia si mereken kebijaksanaan e man Jusuf? Raja Firaun pe naksikenca maka e kerina bekas pemere Dibata, Kesah Tuhan lit i bas ia. Kesah Tuhan e nge si ngajari uga erbahan keseimbangan geluh. Perlukal si bereken dirinta ingan erdahin Kesah Tuhan e. Kesah Tuhan e mabai kita mpepulung kerina si mehuli i bas geluhta enda. Secara pertendin, beluh min kita nusun ntah pe nimpan perbahanen Dibata si enggo pernah sialoken ras sinanami, nginget-ninget kalak si nggo mereken ngaruh mehuli man banta, pasu-pasu Tuhan si tetap si aloken seh wari enda. Perlu e ipepulung kerina. Secara keuangan Kristen pe, Jusup banci jadi usihenta, gelah nggeluh sederhana asa cukupna, gelah lit denga asamta guna wari-wari si arah lebe. Di lit pe rejekinta wari enda perlu iahan pos-posna gelah la ketuduken guna wari si pepagi. Sejarah nuliskensa maka lit paksana mesera bagi sangana sidalani kita pandemic menuju endemic Covid-19. I bas si e pengalaman Jusup ngajari kita megegeh secara pertendin ras pentar ngaturken perbeliten, maka ngasup ngalaken kerina situasi.